


5-8/ 96/ 2023

Ortner

Հայագիտությունը
Եվրոպայում
Armenian Studies in Europe

ORER\ DNY \ - Arménsko - evropský časopis
Armenian European Magazine | Եվրոպական անկախ ամսագիր



Հայագիտության նվիրյալ նահապետը. Լեոն Արքեպիսկոպոս Զեքիեան

«Մխիթարը եղած է բովանդակ կեանքիս ներշնչումի
ակնաղբիւրը եւ հիմնական ուղեցոյցը»

Եվրոպայի հայագիտական կրթության
հիսունից ավելի մշակների բացառիկ
հարցազրույցները ՕՐԵՐ-ի այս համարում



GERDA HENKEL STIFTUNG

ԱՆԻ՝ ԿՈՐՍՎԱԾ քաղաքը նախագիծը

Ներկայացնում են նախագծի հեղինակները՝
Կարէն Զալլաթեանը եւ Կոնրադ Սիեկիերսկին

-Ո՞րն է «Անի՝ կորսված քաղաքը» նախագծի բովանդակությունը:

-«Անի՝ կորսված քաղաքը» միջկրթանքային հետազոտական ընթացիկ ծրագիր է, որն իրականացվում է Եվրոպայում հայագետների կողմից: Ծրագիրը ֆինանսավորում է Գերդա Հենկել Հիմնադրամը և ընդգրկում է Լայպցիգի Արևելյան Եվրոպայի Պատմության և Մշակույթի Լայբնիցի Հիմնարկը (GWZ) ինչպես նաև Բեռլինի Ազատ Համալսարանը: Միջնադարյան հայկական թագավորության մայրաքաղաք Անին եղել է քաղաքական, տնտեսական և մշակութային զարգացած կենտրոն, որը դարերի ընթացքում խորհրդանշել է հայկական պետականությունը: Հայկական պատկերացման մեջ և նրա սահմաններից դուրս կորսված քաղաք Անին իրական վայրից վերածվել է երևակայականի՝ դառնալով մնայուն մշակութային պատկերակ (icon), որին հղվել են հայ գրողների սերունդները 10-րդ դարից մինչև մեր օրերը: Կլոդ Մուֆաֆյանի խոսքերով, մայրաքաղաքը հիշեցնում է մի փյունիկ, որը կրկին ու կրկին դիտվել է որպես հայկական մշակույթի, ավանդույթների և պատմության կարևորագույն կենտրոն: Հետևաբար, Անիի վերաբերյալ միջնադարի համագիրում բազմաթիվ հետազոտություններ կան, սակայն վերջին ժամանակներում բավարար ուշադրություն չի դարձվում այս կորսված քաղաքի ընկալմանը: Գտնվելով Թուրքիայի արևելքում՝ Հայաստանի հետ փակ սահմանագծին, Անին ծառայել է որպես տարբեր ինքնությունների աղբյուր Հայաստանում և հայկական սփյուռքում՝ կրելով ոչ միանշանակ արժեքներ օսմանյան և ներկայիս թուրքական ներքուստ բազմազան հասարակություններում և լինելով ուսումնասիրության դժվար առարկա մի շարք գիտական կրթանքների համար:

Այս նախագիծը նպատակ ունի անդրադառնալ կորսված Անի քաղաքի ստեղծած բարդ համադրություններին՝ փնտրելով հետևյալ հիմնական հետազոտական հարցերի պատասխանները. *որո՞նք են այն հարացույցները, որոնց միջոցով հայկական մշակույթը՝ որպես ազգ պետություն և որպես սփյուռք, Օսմանյան կայսրությունն ու Թուրքիան հարաբերվել և հարաբերվում են կորսված Անիի հետ: Որո՞նք են կորսված Անի քաղաքից ազդված հիշողության այս ոլորտների ներքին կառուցվածքներն ու շարժաբանությունը (դինամիկան): Ինչպե՞ս են այս ոլորտները առնչվում միմյանց հետ:*

- Ովքե՞ր են ներգրավված նախագծում:

- Բալինտ Կովաչը՝ այս նախագծի գլխավոր հետազոտողը, պատմաբան է և Բուդապեշտի Պիտեր Պազմանի Կաթոլիկ Համալսարանի Հայագիտության ամբիոնի վարիչ: Հրատարակել է Անիի և Արևելյան-Կենտրոնական և Արևելյան Եվրոպայի «Անի-հայերի» պատմության վերաբերյալ Մինաս Բժշկյանի ուղեգրության գերմաներեն ծանոթագրված թարգմանությունը (Kovncs 2019): Գերմանական և հայկական հրատարակություններում նա ուսումնասիրել է Անիի հիշողության հայեցակարգային հիմքերը 19-րդ դարի սփյուռքի հասարակություններում (Kovncs 2015): Էլկե Հարթմանը՝ ով նույնպես նախագծի գլխավոր հետազոտողներից է, իսլամագետ ու օսմանագետ-պատմաբան է: Նա Բեռլինի Ազատ Համալսարանի Օսմանագիտության և Թուրքագիտության ամբիոնի վարիչն է: Պրոֆեսոր Հարթմանը հիմնել է «Յուշամատեան» նախագիծը, որը նվիրված է հայկական քաղաքային և գյուղական կյանքի վերականգնմանը օսմանյան հասարակությունում հիմնականում ընտանեկան արխիվների, ինչպես նաև հայկական «յուշամատեանների» միջոցով (www.houshamadyan.org): Նրա հետազոտությունները կենտրոնանում են ինքնակենսագրական աղբյուրների թեմաների, ընկալումների պատմության, lieux de memoires-ի (հիշողության վայրեր) վերակառուցման և վերաաշխուժացման օրինաչափությունների, կորցրած վայրերի, Հայոց ցեղասպանությունից հետո օսմանյան


հայերի կորսված կյանքի աշխարհի վրա (Hartmann 2021, 2018): Պրոֆեսոր Հարթմանի հսկողության ներքո Բեռլինի Ազատ Համալսարանի Օսմանյան և Թուրքագիտության բաժնում մեկ ասպիրանտ աշխատում է կորսված Անի քաղաքի քրդական և թուրքական ընդունելության վրա:

Կարէն Զալլաթեանը նախագծի գլխավոր հետազոտողներից է: Նա ուսումնասիրում է ժամանակակից հայկական սփյուռքի շարժաբանությունը՝ ի նկատի առնելով Հայաստանի ու ավելի լայն աշխարհի հետ առնչությունները և ծանոթ է Հայաստանի գրական և մշակութային զարգացումներին:


Դոկտոր Զալլաթեանը հրապարակել է աշխատություններ սփյուռքահայ ֆիլմարտադրության, մասնավորապես Ասոմ Էդոյանի մասին (Jallatyan 2017, 2020): Նրա հրատարակման ընթացքին մեջ գտնվող էսսեները մեկ այլ կարևոր սփյուռքահայ կինոռեժիսոր Կարինե Թորոսյանի, ինչպես նաև սփյուռքահայ նշանավոր բանաստեղծ, քննադատ և հասարակական մտավորական գործիչ Վահէ Օշականի (1922-2000) գործերի միջով վերլուծում են հայկական սփյուռքին համապատասխան ապատարածքայնացման շարժաբանությունը: Դոկտոր Զալլաթեանն ուսումնասիրում է Անիի հիշողությունը որպես կորսված քաղաք, 19-րդ դարից սկսած հայերեն (արևելյան և արևմտյան) գրված թատրոնում, պոեզիայում և արձակում, ինչպես նաև ճանապարհորդական գրականության և տեսողական վերկայացման մեջ:

Կոնրադ Սիեկիերսկին նախագծի երկրորդ հիմնական հետազոտողն է: Նրա թեկնածուական ատենախոսությունը ժամանակակից հայ մշակույթում ուխտագնացության թեմայով է, որը նա ներկայացրել է Լոնդոնի Քինգս Բոլեյի Աստվածաբանության և Կրոնագիտության ամբիոնում: Որպես մշակութային մարդաբան, նա հետազոտություններ է կատարել Հայաստանում և հայկական սփյուռքում հայկական ինքնության, հիշողության, կրոնականության և նյութական մշակույթի թեմաներով: Նրա ամենաթարմ նախագծերից են

ուսումնասիրություններ հայկական կրոնական ձեռագրերի, ինչպես նաև վաղ տպագիր կրոնական գրքերի և մագաղաթների պաշտամունքի մասին: Սիեկիերսկին խմբագրել է «Հայաստան. ժամանակակից մշակույթ մարդաբանական տեսանկյունից» (2014 թ.) և «Հայերը հետսոցիալիստական Եվրոպայում» (2016 թ.) աշխատանքները և լայնորեն հրատարակվել է գրախոսվող ակադեմիական ամսագրերում և հատորներում:



Կարէն Զալլաթեան





Կոնրադ Սիեկիերսկի

- Ի՞նչ ծրագրեր ունեք «Անի՝ կորսված քաղաքը» հետազոտական նախագծի վերաբերյալ:

- 2023 թվականի դեկտեմբերի սկզբին կազմակերպելու ենք «Անի՝ կորսված քաղաքը» նախագծի բացման աշխատաժողովը: Այն կանցկացվի Բեռլինում: Բացի հիմնական հետազոտողներից, այն կներառի գիտնականների միջազգային խմբի և ասպիրանտների: Մեր երկարաժամկետ նպատակն է կազմակերպել միջազգային գիտաժողովներ, հրապարակել հոդվածներ և խմբագրել համապատասխան թեմաներով հատորներ: Այս կերպ մենք հույս ունենք ուշադրություն հրավիրել Անիի՝ որպես կորսված քաղաք, հիշողության շարժաբանության վրա: Սա իր հերթին կարող է օգնել մեզ ավելի լավ պատկերացնել հիշողության, անցյալի և մշակութային ժառանգության տարբեր ձևերի ժամանակակից հարաբերությունները ընդհանրապես՝ ազգային ու սփյուռքյան համագրերում:

Նմուշ 1. *Բագրատ Այվազյանցի «Անին ծախուեցաւ» պատմավեպի տիտղոսաթերթը, որի իրադարձությունները տեղի են ունենում 11-րդ դարի Անիում եւ որը հրատարակվել է Կոստանդնուպոլսում 1910 թվականին: Այս հատորը հայտնաբերվել է Փարիզի «Նուպարեան» գրադարանում, 2023 թվականին՝ ամառային հետազոտության ժամանակ:*

Նմուշ 2. *20-րդ դարի սկզբին գրված ականավոր պատմաբան Լեոյի (Առաքել Բաբախանյան) «Անի» պատմական ուղեգրության 1946 թվականի Երևանում խմբագրված հրատարակության տիտղոսաթերթը: Այս հատորը հայտնաբերվել է Փարիզի «Նուպարեան» գրադարանում, 2023 թվականին՝ ամառային հետազոտության ժամանակ:*



ՕՐԵՐ